



CONVENIO ENTRE O INSTITUTO GALEGO DE PROMOCIÓN ECONÓMICA (IGAPE) E A ASOCIACIÓN ESPAÑOLA DE MAYORISTAS IMPORTADORES, EXPORTADORES Y TRANSFORMADORES DE PRODUCTOS DE LA PESCA Y ACUICULTURA (CONXEMAR) PARA A ORGANIZACIÓN CONXUNTA DUN PROGRAMA DE COMPRADORES NA FEIRA CONXEMAR 2025

Covadonga Toca Carús, nome e representación do Instituto Galego de Promoción Económica (en adiante, **Igape**), co NIF Q6550010J e domicilio social en Edificio Igape, Complexo Administrativo San Lázaro, s/n, 15707 Santiago de Compostela, na súa calidade de directora xeral. Está facultada para este acto en virtude da delegación de facultades recollida na Resolución do 18 de setembro de 2023 (DOG núm. 184, do 27 de setembro de 2023).

Eloy García Alvariza, con DNI n.º [REDACTED], como presidente da Asociación Española de Mayoristas, Importadores, Exportadores y Transformadores de productos de la Pesca y Acuicultura (en adiante **Conxemar**), con dirección social en Avenida Beiramar 29, bloques 5 e 6, 36202, Vigo, e NIF G-36636819, actuando en nome e representación desa entidade en virtude do certificado emitido con data 11 de xaneiro de 2023 polo Ministerio do Interior, inscrita no Rexistro Nacional de Asociacións co Número Nacional 584217.

Ambas partes recoñécense mutuamente a capacidade para formalizar o presente convenio e, por isto,

EXPOÑEN

PRIMEIRO. O Igape, creado pola Lei 5/1992, do 10 de xuño, é un ente de dereito público adscrito á Consellería de Economía e Industria polo Decreto 49/2024, do 22 de abril. Configúrase como un instrumento básico de actuación da Xunta de Galicia para o impulso do desenvolvemento competitivo do sistema produtivo galego, promovendo actividades que contribúan á creación de emprego baseado nun tecido empresarial moderno, internacionalizado e competitivo.

Entre as funcións encomendadas ao Igape en relación á expansión exterior en virtude do disposto no artigo 4 da súa lei de creación, están as de promover a creación de empresas nos distintos sectores de actividade económica que teñan maior impacto e vantaxes comparativas para o desenvolvemento da economía galega, favorecer a modernización e innovación tecnolóxica e organizativa das empresas galegas, proporcionar información sobre os mercados e favorecer o desenvolvemento das exportacións e acordos con empresas estranxeiras, así como apoiar e promover calquera tipo de actividades que contribúan á mellora do sistema produtivo de Galicia, especialmente as de maior importancia estratéxica.

A internacionalización do tecido empresarial galego é un dos eixos prioritarios de actuación dentro da política económica da Xunta de Galicia de cara a mellorar a súa competitividade e acadar o crecemento económico. Unha aposta que se plasma na Estratexia da Xunta de Galicia de Internacionalización da Empresa Galega 2021-2025 que inclúe entre os seus obxectivos o de lograr un significativo aumento na cantidade, calidade e impacto das exportacións da empresa galega en 2025 chegando a un valor total das exportacións galegas de 25.000 millóns de euros, incrementar a base exportadora galega ata acadar 8.000 empresas exportadoras, diversificar os mercados obxectivo fóra da UE, especialmente en Estados Unidos, América do Sur, Asia e o Reino Unido, contribuír a lograr polo menos 1.000 empresas internacionalizadas dixitalmente e acercar o talento exportador ás pemes galegas acercando 500 profesionais galegos especializados na internacionalización.

SEGUNDO. Conxemar constituíuse en Vigo e presentou os seus estatutos para a súa inscrición ante o Ministerio de Tráballo o 12 de xuño de 1987. Dende entón, permaneceu en actividade de forma ininterrompida, rexéndose en réxime de autonomía económico-administrativa. Como asociación,



réxese pola Lei Orgánica 1/2002, do 22 de marzo, reguladora do dereito de asociación, así como polos seus propios estatutos.

Entre os seus principais fins atópanse o fomento e a defensa do sistema de libre mercado, a mellora da competitividade do sector, a protección dos intereses das empresas asociadas e a promoción de accións destinadas ao incremento do consumo de produtos conxelados, en especial os derivados da pesca.

No marco destas accións, Conxemar organiza anualmente a Feira internacional de produtos do mar conxelados, que se celebra no recinto feiral IFEVI de Vigo e que se ten consolidado como un evento de referencia mundial no ámbito da transformación e comercialización de produtos do mar, así como a principal cita internacional do sector do conxelado.

A edición de 2025, que se celebrará do 7 ao 9 de outubro, marcará o 26º aniversario da feira. Na súa última edición, en 2024, o evento congregou en Vigo a 27.080 visitantes procedentes de 110 países e contou coa participación de 760 empresas expositoras de 46 países, consolidando así o seu papel estratéxico como plataforma global para o sector.

TERCEIRO. O obxectivo principal da Feira Conxemar é impulsar e optimizar a comercialización dos produtos do mar conxelados, proporcionando un punto de encontro de relevancia internacional no que están representados todos os eslabóns da cadea de valor.

A feira configúrase como o mellor escaparate empresarial para a innovación en produtos, servizos e novas tecnoloxías, ademais de ser un foro internacional de referencia para as relacións comerciais e o *networking*. A súa representatividade sectorial abarca:

- Produtos do mar.
- Outros produtos conxelados.
- Industria auxiliar (pavimentos, contedores, embalaxes, envases, etc.).
- Maquinaria (liñas de procesado, envasado, etc.).
- Servizos (transportes, seguros, TIC, etc.).

Ademais, a feira constitúe o foro ideal para que as empresas poidan consolidar relacións cos seus clientes actuais e establecer novas oportunidades de negocio. Neste sentido, resulta fundamental facilitar o acceso a importadores e compradores de primeiro nivel, garantindo así o máximo aproveitamento das sinerxías comerciais e a proxección internacional do sector.

CUARTO. Tendo en conta todo o anteriormente exposto, é evidente que promover a participación das empresas do sector dos produtos do mar conxelados na Feira Conxemar, así como atraer a ela potenciais clientes estratéxicos do exterior, resulta de extraordinario interese para a Comunidade Autónoma. Isto débese tanto á proxección internacional da feira como á súa capacidade de xerar negocio, non só para o sector do conxelado en Galicia, senón tamén para outros sectores vinculados á súa cadea de valor.

En consecuencia, ambas as dúas partes acordan subscribir o presente convenio de conformidade coas seguintes,

CLÁUSULAS

PRIMEIRA. OBXECTO

O obxecto deste convenio é organizar conxuntamente a xestión da visita e participación de compradores internacionais no marco da Feira Conxemar 2025. Isto inclúe a organización e coordinación de reunións entre as empresas expositoras e os compradores convidados, así como a promoción da visibilidade institucional do Igapec en formatos físicos e dixitais.



Estas reunións empresariais B2B celebraranse dentro da feira, co propósito de fomentar novas relacións comerciais entre as empresas expositoras e os compradores internacionais, favorecendo así a apertura de novos mercados no estranxeiro.

A xestión e selección dos importadores será realizada polo Igape, a través das súas seis antenas internacionais, e inclúe o desprazamento e aloxamento de ata 15 compradores ou prescriptores.

Os encontros empresariais desenvolveranse nun espazo situado no Hall 2 do recinto feiral IFEVI, baixo a denominación "*Guest Buyers Program – Programa de Compradores*". Cada empresa importadora disporá dunha mesa de reunións onde recibirá aos expositores, seguindo unha axenda organizada previamente.

A través do presente convenio, Conxemar comprométese a executar as seguintes actuacións:

1. Acreditacións e accesos:

- Pases de acceso para os compradores internacionais convidados.
- Pases de acceso á zona feiral para o persoal do Igape.
- Dous pases de aparcadoiro para o persoal do Igape que asista á feira.

2. Oficina Técnica:

- Elaboración das axendas de traballo para os compradores internacionais, cun mínimo de 10 reunións con expositores por comprador, sempre suxeitas ao interese mutuo.
- Adaptación das axendas ás preferencias de produto indicadas polos importadores ao aceptar a invitación á feira.
- Servizo de tradución simultánea para os importadores que o soliciten.

3. Cobertura de gastos de desprazamento e aloxamento:

- Financiamento dos billetes de avión, aloxamento e traslados necesarios para un máximo de 15 compradores internacionais convidados.
- Xestión de todos os gastos e servizos asociados durante o período de execución das actuacións.

4. Espazo para os encontros comerciais:

- Servizo de catering continuado durante o horario da feira.
- Organización de visitas guiadas en inglés para os compradores convidados, co obxectivo de facilitar o coñecemento dos produtos e expositores presentes na feira.

5. Informe de seguimento:

- Conxemar elaborará un informe sobre as reunións celebradas, incluíndo a valoración dos compradores internacionais e das empresas coas que se reuniron.

6. Visibilidade institucional:

Para reforzar a presenza do Igape na feira, garantirase a inclusión do seu logotipo en todos os soportes físicos e dixitais relacionados co Programa de Compradores.

Así mesmo, Conxemar compartirá co Igape as notas de prensa en inglés e castelán xeradas para a feira, permitindo a súa difusión en redes sociais a través do Igape.

Tamén se mencionará a participación do Igape nas redes sociais oficiais do evento.

SEGUNDA. XUSTIFICACIÓN DA UTILIZACIÓN DA FIGURA DO CONVENIO

Motívase a utilización da figura do convenio pola especificidade de Conxemar, unha asociación sen ánimo de lucro que agrupa actualmente 230 empresas e entidades vinculadas ao sector, abrangendo a maior parte dos eslabóns da cadea de valor.

A asociación exerce un papel fundamental no sector, xa que:

- Defende os intereses das empresas dedicadas á transformación e comercialización de produtos acuícolas conxelados, constituíndo un punto de referencia clave para a industria a nivel nacional.
- Representa 230 empresas asociadas, que en conxunto xeran unha facturación anual superior aos 11.900 millóns de euros e empregan a máis de 20.100 persoas.
- Aglutina o 65,6 % da facturación nacional e o 58 % do emprego da industria de comercialización de produtos acuícolas en España.
- No caso de Galicia, o 44,23 % das empresas asociadas a Conxemar teñen sede nesta comunidade, concentrando o 53,07 % da facturación e o 43,08 % do emprego do sector a nivel autonómico.

A relevancia estratéxica e o seu impacto no tecido empresarial e económico xustifican a necesidade de colaboración a través deste convenio.

Por outra parte, as actividades previstas no convenio están plenamente aliñadas coas finalidades de Conxemar. A súa capacidade para integrar a cadea de valor e representar ao sector da transformación e comercialización de produtos acuícolas conxelados fai que sexa o interlocutor idóneo para garantir:

- Unha colaboración eficaz e adaptada ás necesidades do sector.
- A máxima difusión e impacto das accións formativas.
- Aproveitamento óptimo da presenza de representantes de empresas internacionais na feira Conxemar.

Neste contexto, xustifícase a imposibilidade de promover un proceso de concorrência pública, xa que a colaboración con Conxemar permite ao Igape beneficiarse dunha relación áxil, eficiente e plenamente adaptada ás necesidades do sector. Ademais, esta colaboración garante vantaxes estratéxicas e sinerxías que dificilmente poderían alcanzarse mediante outro tipo de contratación.

Finalmente, mediante este convenio o Igape non encomenda unha xestión de servizos a Conxemar, senón que expón un marco de colaboración no que une as dúas experiencias e eidos de competencias de cadaquén para conseguir un fin común como é o de promover e optimizar a comercialización dos produtos do mar conxelados, proporcionando un punto de encontro de relevancia internacional, constituíndose esta canle como axeitada, rigorosa e segura ao través da colaboración leal e profesional entre os asinantes.

É esta idea de colaboración na consecución do fin común é a que fundamenta a subscripción deste instrumento.

TERCEIRA. FINANCIAMENTO

O orzamento estimado para a execución das actuacións previstas no convenio é de setenta e catro mil euros (74.000,00 €) que se distribúen do seguinte xeito:

Actuacións previstas	Orzamento total IVE 21% non engadido
Gastos de oficina técnica	3.500,00 €
Gastos de traslados	2.000,00€
Aloxamentos	16.200,00€
Billetes de avión	28.300,00€
Espazo feiral para ubicación stand B2B	17.400,00€
Gastos de persoal	3.000,00€
Visibilidade institucional	3.600,00€
total	74.000,00 €



Deste orzamento, o Igape fará unha achega máxima de cincuenta mil euros (50.000,00 €) con cargo á aplicación orzamentaria 09.A1.741A.640.0 dos orzamentos xerais da Comunidade Autónoma Galega para o ano 2025.

Conxemar levará a cabo unha achega de vinte catro mil euros (24.000,00€) que se corresponden a gastos operativos que se aplicarán nos apartados de:

- Funcionamento interno de persoal: gastos de persoal.
- Gastos xerais operativos: espazo feiral para a realización das reunións.
- Gastos directamente vencellados ás actividades obxecto do convenio: visibilidade institucional.

Non se entenderá incumplida a obriga de xustificación das actuacións obxecto deste convenio no caso de variacións das contías previstas nas distintas partidas establecidas no orzamento estimado nesta cláusula, cando obedezan a razóns xustificadas e as actuacións que se leven a cabo garden relación directa co obxecto do presente convenio e se compensen uns conceptos con outros.

CUARTA. OBRIGAS DAS PARTES

1. Conxemar queda obrigado á realización do obxecto do presente convenio e a realizar todas as actividades precisas para que as actuacións do convenio se executen correctamente, comprometéndose a:

- Desenvolver actuacións previstas na cláusula primeira deste convenio.
- Xustificar a totalidade das achegas ao convenio a través de gastos atendibles segundo a cláusula terceira do convenio.
- Organizar as actividades do convenio en estreita colaboración co Igape.
- Someterse á inspección e control do Igape co obxecto de supervisar o cumprimento das actividades previstas no convenio e que permitan a esta a súa xustificación financeira.
- Cumprir as normas sobre confidencialidade de datos previstas na Lei orgánica 3/2018, do 5 de decembro, de protección de datos persoais e garantía dos dereitos dixitais.
- Captación de asistentes para as actividades programadas.
- Asumir o compromiso de difundir o financiamento do Igape en todo tipo de publicidade, información e material relativo á execución das actividades deste convenio, con suxeición ás normas da súa imaxe corporativa.
- Achegar a información que lle sexa requirida pola Intervención Xeral da Comunidade Autónoma, o Consello de Contas e o Tribunal de Contas no exercicio das súas funcións de e control do destino dos gastos.
- Someter á aprobación do Igape calquera cuestión relevante antes de levar a cabo as actividades. Este proceso de proposta e visto bo levarase a cabo a través da Comisión de Seguimento do convenio.

2. O Igape comprométese a:

- Colaborar no financiamento do custo das actuacións previstas a través da concesión dunha achega por importe máximo de cincuenta mil euros (50.000,00 €).
- Apoiar e colaborar na organización das accións previstas neste convenio.
- A xestión e selección dos importadores.
- Difundir todas as actividades a través das canles que considere adecuadas e oportunas, e que se acorden entre as partes asinantes.

QUINTA. GASTOS ATENDIBLES

1. Consideraranse gastos atendibles aqueles que, sen admitir dúbida, respondan á natureza da actividades e fins do convenio e que se realicen a partir da data de sinatura e ata o 1 de decembro de 2025.

En ningún caso o custo de adquisición dos gastos atendibles poderá ser superior ao valor de mercado.



En ningún caso se considerarán gastos atendibles os impostos indirectos, cando sexan susceptibles de recuperación ou compensación, nin os impostos persoais sobre a renda. O imposto sobre o valor engadido (IVE) poderase considerar gasto atendible cando a entidade beneficiaria acredite mediante unha declaración responsable que se encontra acollida ao réxime de exención, parcial ou total, do IVE, de xeito que este imposto supón un gasto real nas actuacións ao abeiro deste convenio, citando os artigos da lexislación aplicable que dan soporte a esa situación fiscal.

Serán atendibles os gastos relacionados coas actuacións recollidas na cláusula terceira sendo os gastos detallados os seguintes:

- Custos de persoal de Conxemar, en base a nóminas pagadas e certificado de dedicación ao proxecto.
- Desprazamentos, aloxamentos e manutención de participantes nas actividades e persoal de Conxemar, cando proceda.
- Alugueiros de espazos e medios.
- Asesorías e deseños profesionais relacionados co obxecto do convenio.
- Gastos de publicidade, difusión e gabinete prensa.
- Gastos directamente derivados da acción de promoción no mercado internacional.
- Consultoría ou asistencia técnica especializada en mercados internacionais obxectivo da misión.
- Gastos de promoción e difusión na acción en mercado internacional.
- Servizos de interpretación na misión.
- Outros gastos externos que respondan indubidablemente á realización das actividades e fins do convenio, e que deberán autorizarse pola Comisión de Seguimento.

O listado non ten carácter exhaustivo.

2. No caso de adquisición de bens de equipamento, ou a contratación de servizos ou subministracións e materiais, cando o importe do gasto iguale ou supere os 15.000 euros máis IVE no global do proxecto para un mesmo provedor, deberán achegarse un mínimo de tres ofertas de diferentes provedores, con carácter previo á contratación do compromiso para a prestación do servizo ou a entrega do ben, agás que polas súas especiais características dos gastos non exista no mercado suficiente número de entidades que os presten ou subministren. Estas excepcións deberán xustificarse. A elección entre as ofertas presentadas realizarase de conformidade con criterios de eficacia e economía e achegarase unha memoria xustificativa cando a elección non recaia na proposta económica máis vantaxosa.

3. Os gastos nos que incorra Conxemar serán compatibles con outras cantidades públicas ou privadas que puidese recibir, que deberán ser declaradas na liquidación do convenio (anexo I), e minorarán o importe total a achegar polo Igape na mesma porcentaxe que achega ao convenio.

SEXTA. XUSTIFICACIÓN E PAGAMENTO

1. O prazo de presentación da solicitude de pagamento no Igape comezará o día seguinte á finalización das actuacións indicadas na cláusula primeira e rematará o 1 de decembro de 2025.

2. A xustificación presentarase vía electrónica na oficina virtual do Igape na páxina <https://www.igape.gal/gl/oficinavirtual> achegando as copias dixitalizadas da documentación que se relacionan a continuación. Conxemar responsabilizarase da veracidade dos documentos que presenten.

3. A solicitude de pagamento virá acompañada da seguinte documentación:

a) Informe/memoria xustificativa asinado e selado polo seu representante legal do cumprimento das condicións impostas neste convenio, con indicación das actividades levadas a cabo, dossier fotográfico e resultados obtidos.



- b) Certificación dos gastos, segundo o modelo do Anexo I, facendo distinción entre: gastos de persoal, gastos de subministracións e servizos e outros.
- c) Certificacións expedidas polas respectivas administracións públicas, que acrediten que se está ao corrente das obrigas tributarias e da Seguridade Social, así como a acreditación de non ter pendente de pagamento ningunha outra débeda, por ningún concepto, coa Administración Pública da Comunidade Autónoma ou autorización para que a Xerencia do Igape realice estas consultas polos seus propios medios, segundo o anexo I.
- d) Declaración responsable asinada polo representante legal con poder suficiente, doutras axudas de carácter público ou privado para os mesmos gastos obxecto deste convenio ou, se é o caso, ausencia das mesmas, segundo o anexo I.
- e) Declaración responsable da titularidade da conta bancaria onde se debe realizar o pagamento, segundo o anexo I.
- f) No caso de estar exento do imposto sobre o valor engadido (IVE), documentación acreditativa da mencionada exención.
- g) Ademais, e para xustificar a achega de Conxemar ao presente convenio, relación, mediante documentos oficiais correspondentes tales como facturas, nóminas, etc., dos gastos propios incorridos para o desenvolvemento das distintas obrigas que asume Conxemar.

4. Todos os gastos computables deberán ser xustificados mediante transferencia bancaria, certificación bancaria orixinal ou extracto de pagamento. Non se admitirán os pagamentos en efectivo.

5. Será obrigatorio presentar tres orzamentos para todos aqueles gastos externos superiores a 15.000 € + IVE e xustificar a selección do provedor en caso de non ser o máis económico.

6. En todo caso, o Igape, resérvase o dereito de solicitar toda a documentación que considere precisa en relación coa realización das actuacións obxecto deste convenio, e calquera outra que estime oportuna para a correcta xustificación do gasto e o seu pagamento.

7. Procederá a minoración das contribucións cando as actuacións desenvolvidas e xustificadas o abeiro deste convenio non acaden os importes dos gastos xustificables e sempre que esta minoración non supoña unha realización deficiente do proxecto.

8. Conxemar manterá a disposición do Igape ou de calquera organismo público con capacidade de fiscalización da Comunidade Autónoma de Galicia, tales como Intervención Xeral, o Tribunal de Contas e o Consello de Contas, todos os xustificantes dos gastos e ingresos obtidos a fin dunha verificación *in situ*, ben por medios propios ou mediante auditor externo. O prazo para a comprobación material de facturas e xustificantes de gasto será de 5 anos desde a finalización do prazo de vixencia deste convenio.

SÉTIMA. VIXENCIA E CAUSAS DE RESOLUCIÓN

O presente convenio entrará en vigor o día da sinatura do mesmo e terá duración ata o 30 de decembro de 2025.

O convenio extinguirase polo cumprimento das actuacións que constitúen o seu obxecto ou por incorrer en causa de resolución.

Son causas de resolución:

- a) O transcurso do prazo de vixencia do convenio.
- b) O acordo unánime de todos os asinantes.
- c) O incumprimento das obrigas e compromisos asumidos por parte dalgún dos asinantes. Neste caso, calquera das partes poderá notificar á parte incumplidora un requirimento para que cumpra nun prazo de 10 días hábiles coas obrigas ou compromisos que se consideren incumplidos. Este requirimento será comunicado tamén á Comisión de Seguimento do convenio. Se transcorrido o



prazo indicado no requirimento persistira o incumprimento, a parte que o dirixiu notificará á outra parte asinante a concorrencia da causa de resolución e entenderase resolto o convenio.

d) Por decisión xudicial declaratoria da nulidade do convenio.

e) Por calquera outra causa distinta das anteriores prevista no convenio ou noutras leis.

Se cando concorra calquera das causas de resolución do convenio existen actuacións en curso de execución, as partes, a proposta da Comisión de Seguimento do convenio, poderán acordar a continuación e finalización das actuacións en curso que consideren oportunas, establecendo un prazo improrrogable para a súa finalización, transcorrido o cal deberá realizarse a súa liquidación.

OITAVA. COMISIÓN DE SEGUIMENTO

Coa finalidade de asegurar o cumprimento deste convenio, creárase unha Comisión de Seguimento de composición paritaria, que coordinará o seu desenvolvemento. Reunirase a petición dunha das partes, e actuará como órgano de vixilancia, seguimento e control do establecido neste convenio.

A citada comisión estará presidida por un dos representantes do Igape. En todo o non especificamente previsto sobre o funcionamento desta comisión, serán de aplicación as normas sobre órganos Colexiados previstas na sección III, capítulo I, título I (artigos 15 e seguintes) da Lei 16/2010, de 17 de decembro, de organización e funcionamento da Administración xeral e do sector público autonómico de Galicia. A propia comisión, unha vez constituída, decidirá o réxime das súas reunións.

NOVENA. MODIFICACIÓNS

O presente convenio poderá ser obxecto de modificación cando teña como finalidade o logro dos obxectivos de estabilidade orzamentaria e sustentabilidade financeira. A devandita modificación terá por obxecto a redución do volume das obrigas.

Toda alteración que se realice referente ao contido deste convenio será proposta pola Comisión de Seguimento e deberá formalizarse na correspondente addenda.

DÉCIMA. PUBLICIDADE

De conformidade co artigo 15 da Lei 1/2016, do 18 de xaneiro, de transparencia e bo goberno e co previsto no Decreto 126/2006, do 20 de xullo, polo que se regula o Rexistro de Convenios da Xunta de Galicia, o Igape e a Consellería de Economía e Industria publicarán no *Diario Oficial de Galicia* e na súa páxina web oficial o importe da contribución económica ao amparo deste convenio e a entidade destinataria desta; e incluírá igualmente a referida contribución e as sancións que como consecuencia desta puidesen impoñerse nos correspondentes rexistros públicos, polo que a sinatura do convenio leva implícita a autorización para o tratamento necesario dos datos da entidade e a referida publicidade, así como a súa cesión por parte do Igape aos órganos competentes da a Consellería de Economía e Industria.

Conxemar deberá subministrar toda a información necesaria para que o Igape poida dar cumprimento ás obrigas previstas no Título I da Lei 1/2016, do 18 de xaneiro, de transparencia e bo goberno. As consecuencias do incumprimento desta obriga serán as establecidas no artigo 4.4 da citada lei.

UNDÉCIMA. PROTECCIÓN DE DATOS DE CARATER PERSOAL

En virtude do disposto no artigo 26 do Regulamento (UE) 2016/679, xeral de protección de datos (RXPD) e na Lei orgánica 3/2018, do 5 de decembro, de protección de datos persoais e garantía dos dereitos dixitais (BOE nº 294, do 6 de decembro), se calquera das partes accede a datos de carácter persoal contidos en ficheiros titularidade de Conxemar, adquiren a condición de encargados do tratamento e comprométense a:



- Non utilizar nin tratar datos de carácter persoal cunha finalidade distinta á execución do convenio, non comunicar os datos baixo ningún concepto a terceiras persoas, nin sequera para a súa conservación e, en especial, non reproducir, nin publicar, nin difundir ningunha información acerca dos datos.
- Garantir o cumprimento das medidas de seguridade establecidas, así como a súa correcta implementación.
- Ao termo da relación, por calquera causa, os datos de carácter persoal aos que tiveran acceso as restantes partes, deben ser destruídos ou devolverse ao Conxemar, incluíndo calquera soporte ou documento.

O incumprimento destas obrigas fai responder ás restantes partes das infraccións que cometa coma se ocupase a posición de responsable do tratamento.

O Igape responde fronte a Conxemar do cumprimento destas obrigas polas persoas que na súa representación participen de calquera modo na execución do convenio.

DUODÉCIMA. RESPONSABILIDADE

A subscrición deste convenio non implicará relación laboral contractual ou de calquera outro tipo entre os profesionais ou entidades que vaian desenvolver as actuacións obxecto deste convenio e o Igape, de tal xeito que non se poderá esixir a este Instituto responsabilidade ningunha, nin directa nin subsidiariamente, polos actos ou feitos acaecidos no desenvolvemento do devandito convenio.

DÉCIMO TERCEIRA. AUTORIZACIÓNS

A asociación asinante consente expresamente a inclusión dos datos persoais e relevantes deste convenio nos rexistros públicos que proceda, de acordo co Decreto 126/2006, do 20 de xullo, polo que se regula o Rexistro de Convenios da Xunta de Galicia, así como poderá exercer os seus dereitos de acceso, rectificación, cancelación e oposición respecto do contido dos rexistros antes citados, ante a Dirección Xeral do Instituto Galego de Promoción Económica, sito no Complexo Administrativo de San Lázaro s/n, 15707 Santiago de Compostela, en aplicación do disposto no Decreto 126/2006.

Este consentimento esténdese á autorización para a cesión dos seus datos á entidade financeira na que se aboe o pagamento, ao *Diario Oficial de Galicia* e ás demais cesións previstas na lei.

Tamén comporta a autorización ao Igape para solicitar as certificacións que deban emitir a Axencia Estatal da Administración Tributaria, a Tesourería da Seguridade Social e a Consellería de Facenda e Administración Pública da Xunta de Galicia.

DÉCIMO CUARTA. NATUREZA E RESOLUCIÓN DE CONTROVERSIAS

O presente convenio ten natureza administrativa, quedando fóra do ámbito de aplicación, da Lei 9/2017, do 8 de novembro, de contratos do sector público de conformidade co seu artigo 6, e para calquera cuestión litixiosa que se derive do mesmo, será de aplicación a Lei 29/1998, do 13 de xullo, reguladora da xurisdición contencioso-administrativa.

Ambas partes comprométese a resolver de común acordo, ante a Comisión de Seguimento, calquera controversia que puidera suscitarse sobre a interpretación ou execución deste convenio. En caso de conflito, ambas partes acordan someterse á Xurisdición Contencioso-Administrativa.

DÉCIMO QUINTA. NORMATIVA APLICABLE

Para todo o non previsto neste convenio aplicarase o previsto na Lei 40/2015, do 1 de outubro, de réxime xurídico do sector público, así como na Resolución do 8 de abril de 1991 (DOG nº 82, do 30 de abril) pola que se fai público o acordo do Consello da Xunta de Galicia, do 27 de marzo de 1991, sobre



convenios de cooperación con outros entes públicos e de colaboración con particulares, na Lei 1/2016, do 18 de xaneiro, de transparencia e bo goberno e no Decreto 126/2006, do 20 de xullo, polo que se regula o Rexistro de Convenios da Xunta de Galicia, en todo o que non contradiga a primeira.

E en proba de conformidade, as partes asinan o presente convenio o 17 de xuño de 2025.

Polo Instituto Galego de Promoción
Económica

Por Conxemar

D^a Covadonga Toca Carús

D. Eloy García Alvariza

ANEXO I

DECLARACIÓN E AUTORIZACIÓN

----- con DNI -----en nome e representación de Conxemar con número de identificación fiscal -----

DECLARO, baixo a miña responsabilidade, que a entidade a que represento non mantén ningunha débeda nin obriga pendente coa administración tributaria estatal española e galega, coa Seguridade Social española nin coa Xunta de Galicia.

DECLARO, baixo a miña responsabilidade: que para os mesmos gastos acollidos ao convenio entre o Igape e Conxemar para o exercicio 2025, a entidade que represento:

- Non ten recibido ningunha outra axuda nin pública ni privada.
- Ten recibido as seguintes axudas polos importes que se detallan:

Organismo convocante	Data de solicitude	Importe solicitado (€)	Data de aprobación	Importe recibido (€)

DECLARO que as actuacións contempladas e realizadas na anualidade 2025 incluídas neste convenio entre o Igape e o Conxemar foron as seguintes:

Descrición da actuación	Data e lugar celebración	Importe total do custo da acción	Relación das facturas incorridas na celebración da acción, incluíndo importes

Relación, mediante documentos oficiais correspondentes tales como facturas, nóminas, etc., dos gastos propios incorridos para o desenvolvemento das distintas obrigas que asume Conxemar, entre os que caben salientar, a modo de exemplo, os seguintes:

Concepto Gasto	Importe do gasto incorrido

Todos os gastos computables deberán ser xustificadas mediante transferencia bancaria, certificación bancaria orixinal ou extracto de pagamento. Non se admitirán os pagamentos en efectivo.



DECLARO, baixo a miña responsabilidade, para os efectos de poder ser beneficiario das contribucións obxecto deste convenio, que os datos consignados nesta declaración relativos á conta bancaria aberta ao nome da entidade a que represento son certos. A falsidade do declarado determinará a imposibilidade de percibir, de ser o caso, os dereitos recoñecidos no procedemento administrativo desde o momento en que se teña constancia da falsidade, sen prexuízo das responsabilidades penais, civís ou administrativas que procedan.

Entidade	Sucursal	D.C.	IBAN

A entidade comprométese a comunicar ao Igape calquera cambio ou novidade na información que pola presente se declara, a partir da data abaixo sinalada e ata a finalización da liquidación do convenio de referencia.

.....,de.....de.....

Asdo.